

摘藻堂四庫全書薈要

集部

欽定四庫全書薈要

集部

青山集卷十二

詳校官助教臣常循



欽定四庫全書薈要卷一萬五千一百一

集部

青山集卷十

宋 郭祥正 撰

長句古詩

寄獻荊州鄭紫微

毅夫

李白不愛萬戶侯但願一識韓荊州
荊州太守古來好至今文采傳風流
鄭公辭賦天下絕殿前落筆鏗琳瑯
相如嚴謹返枯澁宋玉爛熳鄰倡優
卓然風格出天造

冰盤洗露銀蟾秋麻衣脫去未十載寶犀飾帶魚懸鈎
道行言聽遇明主皂蓋朱轡寧久留渚宮風物最蕭
洒酒滿金罍誰獻酬公嘗愛我如李白恨不即往從公
游醉看舞袖卷明月夜聽長笛臨高樓詞源感激瀉江
海筆陣頓挫排戈矛駕駘蹇蹶固已困勉之尚欲追驛
騶一朝公歸坐廊廟致君事業如伊周門闌從衛愈嚴
密是時願見應無由行當投印佩長劍夢魂已附西江
舟

姑孰乘月泛漁艇至東城訪耿天隲

姑孰望東城長江八十里思君半夜泛漁舟明月隨人
渡寒水江南美酒君家無攜來相就傾一壺澄江如冰
月如玉拂拂清風生碧虛功名無成安足嗟但令方寸
無疵瑕煉丹辟穀亦瑣瑣萬物何處非生涯君不見鴻
溝欲將天下裂失道陰陵遽身滅玉帳周遭皆楚歌金
甲續紛摧漢鉞重瞳却傳繪塑手瓦鼓巫歌薦神酒廟
前老木藏訓狐豪氣英風亦何有沈吟往事君勿悲我

曹幸遇堯舜時田中穀稔牛羊肥高會難逢易別離今
宵不醉欲安之

西山謠寄潘延之先生

男兒無成羈薄祿日月相推猶轉轂誰向生前悟此身
西山山人掛冠速買田築室臨西山時來石上橫琴彈
千古萬古治亂事一曲兩曲頓挫松風寒門前禾熟醞
美酒故人車馬留盤桓榮亦不足貴辱亦不我干但願
青山綠水兩不變醉醒自得窮觀玩名落人間非所欲

閉門且喜辭憂患君不見李太白朝為酒家仙暮作金
鑾客醉裏題詩宮妾扶自謂過君今古無一朝讒言入
君耳夜郎遠謫吟覓孤到死空言竟何補何如道行及
妻子西山山人孰可比晴空矯矯孤雲飛欲往扳援傷
路岐

上趙司諫

彈劍思經綸悲歌負陽春逢時不自結明主空文亦是
尋常人君不見太公辭渭水謝安起東山日月再開天

地正龍虎感會風雲間又不見屈原澤畔吟離騷漁翁
大笑弗舖糟可行則行止則止胡為憔悴言空勞夫君
之名振朝野道行諫聽逢時者南州豈足舒君才天門
夜詔星車迴紫皇之真人造化無嫌猜往將和氣輔舒
慘不令地下萬物同寒灰功成收身綵雲裏坐酌千觴
浮玉藥麻姑王母相經過醉來共泛瑤池水樂亦不可
盡名亦不可窮願學李賀逢韓公他日不羞蛇作龍

贈張御史

公遺

我愛張御史酒船打拍浮音扶欲邀天下賢盡向酒中愚

世人雖飲酒只知酒味不知酒意胡為乎又聞夜歸東
海頭撫掌喚月當金壺須臾蝦蟇蝕月黑公起磨刀代
天抉蝦蟇吐月入地走玉兔還家桂樹不枯公方醉卧
常娥驚呼旦語東方蒼青龍遲遲推出赫日車自然月
光不減公飲不徹是時應笑高陽徒

贈提宮諫議沈公

立之

神仙之府名雞籠千尋翠玉擎寒空秀色凌風入城郭

半銜曉日金濛濛賢材間出萬人傑行脫麻衣趨紫闕
三朝出入持使權凜凜聲名洒冰雪往年作鎮來金陵
天子臨軒宣老成問公書盡幾萬卷品秩入奏編瑤瓊
延閣往往未嘗有詔札獎與光華生僉言公歸坐廊廟
易節暫刺玄暉城懇請仙宮遽知止車蓋翩翩還故里
粉娥執樂四時春窈窕芙蓉新出水嘈嘈弦管鸞鳳鳴
玉卮獻酒公解醒人生快意似公少家園乃是真蓬瀛
數峯飛來雲霧濕琪樹玲瓏曉寒入綠池水照百花明

芳亭小榭佳賓集有時自賦歸來篇幅巾藜杖詩中仙
秦晉諸子因避世種柳栽桃安足憐顧我登門二十載
貴勢能忘竟相待數奇自笑無所成亦欲浮舟往滄海
滄海雲濤人不爭忘機可以超神凝比公進退殊未足
若問逍遙無鷗鵬

贈孫郎中

景修

江潮夜漲北風惡雙櫓喜逢溪岸泊桂陽使君賢故人
偕問慇懃更來數浮橋傾危暗難渡靜枕不眠聽曉角

平明自笑僕乘無破帽赤髯行蹉跎袖持漫刺前起居
屢歎窮愁手頻握嬰兒連死瘦妻卧病骨尚遭讒喙詠
壯志消盡同寒灰生事無涯委藜藿男兒有命何足論
斗酒貫衣評舊學愛君新篇溢千楮突兀寒宵見南嶽
龍蛇千丈老松杉霹靂一聲揮電電豈宜偃蹇處郎曹
固合逶迤步臺閣天子聰明繼堯舜廟堂論道皆伊霍
拔茅連茹收時才尺寸高卑應不錯君馳亨路鶚橫秋
我困汙泥龜縮殼

贈張叅軍待舉

宣城之人張待舉高才未得見明主
強將樽酒娛天真
猶得狂名落寰宇
陶陶復陶陶意氣蛟龍豪
滄溟豈是遠銀漢
不為高路逢郭子陵陽津
平生未識如故人相歡握手輒大笑
共訪瑤池尋玉真
天門夜叉識慮惡為我無錢謹闢鑰
典闌却駕彩雲歸別入紅窓共君酌
醉來兀兀乘扁舟長溪水碧芙蓉秋
願逢萬丈龍鬚席卷取明月歸玉樓

贈彭明微判官

昔謁公家賢侍郎一見許我能篇章俸錢沽酒屢持送
時時解榻令登堂今喜清風傳令子回首亨衢脫雙屐
北堂歸養太夫人水陸珍羞稱甘旨深沈大第蟠此鱗
兒孫藍綬何詵詵有時宴喜列賓客洞房粉黛桃花春
玉指纖纖拂絃索輕雲凝碧羅衣薄主人快意妾爭妍
松上女蘿知有託君不見景太傅殺身本為功名誤又
不見張舍人朝為近侍夕為民古來寵辱亦如此安用

浮雲纏此身愛君進退真得所不負青春領歌舞我方
兩鬢撲黃塵夢寐江南思舊土別君去將拂衣扁舟若
渡歷陽月願聽新歌酹歸

闕

贈舒州李居士

惟熙

李居士存心最慕韓伯休
州城賣藥不二價
世人求我
我何求
顏如渥丹
眼如漆
和氣酣酣吐
朝日偶來握手
為一言
照盡五臟
平生疾
篋中自取三粒丹
瘦骨坐使
春陽還便當
投印棄冠帶
與君海上巢
名山深鋤茯苓
釀濃酒
極飲形骸可
長久
乘槎鼓枻入雲濤
醉放一絲
攜六鰲

謝杜倅職方兼簡湯使君

李白昔游宣城時誰為太守賢相宜掣鈴交通喚六博
壯哉意氣凌虹霓北望樓高氣象古遺風餘思猶依依
我來正值青春半雜花爛笑禽爭飛輕煙繚繞淡白日
細風蕩漾吹游絲高樓簾卷鄰袖出百尺欄干橫酒旗
銀鞍白馬不知數龍箏鳳管相追隨杜陵遠孫駕別乘
恩威得所名聲馳華堂重構喚賓客風前共倒黃金卮
我為下客最踈放辱君許可能文詞死生寅緣釋氏說
但覺時換名姓非寄言太守勿感感共對佳人花下迷

莫教流水落花去空聞暮雨哀猿啼

謝劉察推

辛老丞相

秋風吹霜入松栢虛谷聲遙寒刺刺月華正高星宿稀
獨鶴不鳴鶩插翼是時夫子為我吟逸調雄才世無敵
十年學詩自謂豪一日逢君有慙色恍疑醉夢大帝家
寶藏珠樓不知極蟠桃結實九重春金銀琅玕萬林直
須臾收拾到平淡雨洗高峯增老碧又如摩詰畫思精
一幅霜綃數拳石鬼神怪變露形狀天地英華發胸臆

我家江南謝朓山山深流水長潺潺
獼猴摘菓趨不去白雲常在衣裳間
斷無車馬送塵土獨與猿鳥期追攀
一杯有酌醉復醉萬慮不到閒中閒
欲邀君去詠此景願窺巨筆追揚班
其餘功業未足數天馬安得超塵寰

謝東城練尉

我聞武夷山迺是神仙府靈丹插峭壁
異骨留深塢有時風高月色靜天樂琤
淙散天宇飄飄秀氣鍾為人往往聲名
邁前古練君頭角傑然奇少年折桂登
雲梯陸

機才華恨羞澁相如詞調慙支離青衫一命東城尉能
使斯民歌愷悌鸞鳳肯與雞鶩爭萬里雲霄終自致東
城煙水秋茫茫覽古高吟應斷腸白蛇血濺赤龍劍八
千子弟同時亡而今戰處無青草廟門斜掩狐狸老羣
巫請雨搖鐸刀滴瀝椒漿薦蘋藻力拔山兮安在哉丹
青壁畫空塵埃因君吟想不能已孤雁一聲山月頽

謝淮西吳提舉

子中

瘦馬徐行三百里撲撲黃塵眼雙眯手攜簿法趨使臺

惟恐瑕疵煩摘指藍衫慙慙走廊廡與坐撫循顏色喜
琅琅先誦荊州吟醉來捉住鯨魚尾如今無復氣凌雲
俯首低徊逐泥滓須臾共忘按察尊羅列壺觴瞰池水
圓荷翻風碧玉軟幽鷺得魚團雪起正當煩暑浩如秋
更聽高談清入髓君臣會合前世無朝廷萬事圖新美
甲光照日御營寒戟影凝霜朔風裏自嗟雖老力未衰
命未遇知甘擯死南山射虎竟殘年不得封侯亦徒爾
感君欲引西江波涸轍行將脫螻蟻功名成就須報恩

莫道江南無壯士

仲春櫻桃下同許損之小飲因以贈之

君不見古人悲歌愁殺人一片花飛減却春徑須沽取
就花飲暫時爛醉陶天真借令黃金大于斗豈買人間
百年壽但願青春永不歸更得滄溟化濃酒朝酌弗乾
暮傾弗竭東向浮桑採日枝西入瑤池浴明月枯桐三
尺安足彈重華去矣薰風寒夷齊恥食首陽粟屈子徒
佩瀟湘蘭噫吁噉哉賢與愚同歸一死胡為乎共君極

飲且爛醉指點世路皆虛無許損之爾為我滿斟我為
爾高吟相逢莫恨晚結交貴知心坐看南山一片霧忽
成千里萬里之春陰

再游花山

去年來時春未歸殘雪在樹橫老枝今日重來春已去
秀葉茂密藏黃鸝山家景物新換故世事塵埃朝復暮
白頭迤邐謝輪蹄青塚綿聯老狐兔令人歸興如浮雲
早向江山樂賤貧不須訪道赤松子共愛鱸魚并紫蓴

酬蔡尉秘校

環峯雨過煙嵐披君醉兀兀騎驢歸明朝大字送滿篋
乃是醉掃琅瑯詩陽冰篆筆昔未有鐵索礪礪纏蛟螭
禹偁八詠不足數永叔爛漫鐫瑤碑山光水潤洗出太
古色更後敢作知為誰愛君膽大少且銳攬剔缺漏筆
補之飄然一別今七載取讀往往生光輝寧知流落尚
為尉瀟湘邂逅令人噦又致新章溢編楮遣僕買酒烹
黃雞伊余齒髮更衰落固異往昔相逢時舉杯未盡輒

醉倒嘴吻雖強難扶持人生老去百無益談新憶故惟
傷悲勸君休吟亦勿飲檇株拘坐真忘機死生終始了
如一清風為我炎天吹

酬李從道太博

秋水浸天無表裏開帆已過三千里鸚鵡洲前逢故人
往事新愁還可紀祖朝熙熙民物好長憶聯車游五老
鳥啼花舞送春歸倏忽官書滿三考從茲南北起塵勞
往往遭嗤兒女曹斗筭之祿未能棄回首空羨嚴陵高

相逢彼此驚遲暮筆下琳琅寫心素荷花十頃遶君家
豈是荒榛礙歸路悲歌不覺青衫濕酒杯未滿愁先入
聞說明朝趁玉京直節如今恐難立

公擇鄂守學士三堂請雨

廟門斜開壓江浦紅裳小巫來擊鼓太守焚香令致詞
願駕蒼龍作霖雨三神鼎峙名謂何子胥范蠡馬伏波
圖經莫載碑字滅忠魂血食應不訛朝廷日夜傳新令
輔弼賢良元首聖陰陽調燮神相之忍使斯民飢以病

酬魏炎秀才

碧雲暮合廬山頭夜蛩聲撼鄉園愁忽然一見舊游客
貰酒不惜千金裘高談稍聽吐胸臆歛如野燒光難收
虎豹哀嗥走不徹獵網四面誰能搜嗟予慄慄畏事者
兀坐視予勞雙眸主人欣歡亟掃室雁榻旋列橫霜秋
兩溪倒碧瀉明月松窓左右風颼颼長篇贈我不可和
和聲酸澁令人羞

青
山
集
卷
十

欽定四庫全書薈要卷一萬五千一百二

集部

青山集卷十一

宋 郭祥正 撰

長句古詩

魏中舍家藏王摩詰海風圖

只聞王公畫山水未識王公滄海圖
魏侯矜誇我家有取出十幅堂中鋪
誰知東海羣龍力神妙能以一筆驅
洪濤翻天雪成隴黑分雲霧藏空虛
高低數寸折萬丈

勢以意會無差銖却嗟流傳數百載絹素何以當涵濡
王公之心壯莫比其功欲出造化初惜哉已死不復得
悵望盡日將何如魏侯魏侯重藏秘直恐變化成江湖
我歌不足徒嗚呼

王元當家藏鍾隱畫三害圖

老鍾筆法何奇古三害精靈一圖聚周生自握蒼精龍
白額長蛟甘喪沮危橋跨水壓波濤巨木翻風暝煙霧
挺然獨往知忘軀敢謂誅邪天地助三日生還動閭里

千載遺蹤存絹素薄蝕已更人仰之自古賢豪遺細故
何獨今人無此人已覺丹青有深趣江南印璽尚如新
國破倉忙畫誰付一圖分裂藏三家離合悠悠歲時度
只今皆屬丞相孫掛向高堂邀客顧倏然風雲駕霹靂
雨來平地銀潢注珍綈收藏卷不徹直恐變化復入江
湖去

燕待制秋山晚景

王荆公有
詩跋其後

我朝妙畫能山水燕公筆法精無比燕公山水工平遠

一幅霜綃折千里瀟湘洞庭日將晚雲物蕭蕭初滿眼
虞帝之魂招不返霜樹冥冥紅葉卷二妃血淚知幾多
竹上遺痕深復淺漁舟片帆風已滿漁父橫眠思猶懶
時時白露聚圓沙亦有行人下前坂江回岸斷數峯青
髻歸靈妃曲可聽却逢深掩見茅屋咫尺桃花如武陵
世間何物人爭詫請說奇書并妙畫一時鑒賞安足論
流轉千年愈增價珍紉一襲藏至珍卷尾長篇更入神
嗚呼粉墨終成塵唯有文章道德能日新

夏公酉家藏老高村田樂教學圖

高生妙畫世所知君藏兩幅尤瑰奇
春回老柳未全綠和氣盎盎微風吹
負暄當案誰氏子坐以訓詁傳童兒
麻鞋破穿十指露紵衫短袖烏巾欹
眼吻開張手捉筆叱怒底事揚其威
兩童分爭迭相挽彼二稚子傍觀窺
一童獨卧守書卷性習已見分醇醪
皤然老叟醉兀兀二孫側立猶扶持
餘皆伶官雜村妓插笛放鼓陳威儀
三犬奔來吠欲嚙二人驚顧方攢眉
鄰家有子少亦黠

兩手據鞍驢載之尊卑向背極精妙精妙得以意思惟
田翁豐年固取樂又能教子勤書詩德澤涵濡賦斂絕
致我鼓腹咸熙熙畫工亦畫太平事誰欲擾之生亂離
高生高生不獨愛爾之妙筆對此頗思三代時

寂照大師匣藏相國寺壞壁秋景

京城車馬多塵埃一見妙畫心眼開深山老木秋思靜
苦霧鬱鬱諸峯埋客騎蹇驢打不動懊惱似憂寒雨來
崖平路轉斗然絕筆力未斷空徘徊胡為皴剥僅盈尺

鐫以大篋過瓊瑰師云昔是殿堂壁治平大水餘皆摧
恰如盧仝玉碑子中路撲折令人哀玉碑一折乃無用
此畫雖缺猶堪裁君不見山前路路長不獨憂風雨前
有毒蛇後猛虎磨牙矯尾藏深塢聖人皇皇嗟逆旅畫
工意思非無補非無補誰信之紛紛門外誇輕肥

泗水雍秀才畫草蟲

蜻蜓點水蝶撲花螳螂捕蟬蜂趁衙營營青蠅爭腐糝
趑趄阜螽訟草芽徐生骨朽不復得雍子筆老誰能加

卷開却掩恐飛去
綈襲愛護行隨車
況君才力素精敏
胡不放手為龍蛇
龍蛇逼真看騰躍
出入天地藏煙霞
謝冲雅上人惠草書

上人胸腹包琅玕
醉目睥睨臨水紋
墨池頃刻波瀾翻
虬龍尾尾垂雲間
搖曳夭矯若可攀
霹靂轟奔電火騫
卒章雨雹霏漫漫
瀕洞恐懼坤軸掀
白沙縱橫仆鼃鼃
屋漏壁折安足言
鳥驚出林避彈丸
斗高復下騰修翰
朽木欲折枯藤攢
逸興不顧長毫乾
客如堵牆爭縱觀

詎知聖盡吾鼻端黃金論斗珠走盤數字不售尤為難
爾嘗愛我說玄理為我落筆動盈紙張顛懷素嗟已矣
上人之書無與比

謝鍾離中散惠草書

丈人行草天下無體兼衆善精神俱少年弄翰今懸車
一幅不博千明珠墨池翻瀾化鯨魚老木半折傾藤枯
霜天一陣來雁驚荒陂數點眠鷗鳬換鵝瘞鶴雖已矣
折釵劍舞成須臾心通造物乃神速伯英懷素真其徒

邇來作我醉吟贊寶藏二妙歸江湖要將垂法數百載
摩挲青玉親傳模文人善吟仍善奕名譽豈止專能書
名譽豈止專能書皎如皓雪盈冰壺

謝蔣穎叔惠澄心紙

李氏三世皆名書古今筆法誰能如澄心堂中畜妙紙
敲冰搗楮惟恐麤當時文物稱第一教勅往往親涵濡
赫然真龍躍中國僭迹甘就雷霆誅論功行賞盡金玉
唯有此物多贏餘流傳既久乃珍絕一軸不換千明珠

樂安御史輒寄我二十五幅無纖汙却疑織女秋夜醉
素段割裂天所須又如美玉纔出璞瑩采射目爭陽烏
文章未到二王法寶紙謾對明窗鋪廷珪煤麝銅雀瓦
氣象崔元尤相於坐思厚貺欲為報累旬安得論錙銖
況君才力似韓愈盡當返贈誅奸諛

謝餘干陸宰惠李廷珪墨

集仙昔與文忠游文采聲名喧九州鯤鵬未化忽塌翼
地老天荒雲海幽篋中嘗秘上賜墨

仁宗所賜
李廷珪墨

紫金泥

印雙脊蚪名題廷珪姓氏李此物未省何年留紋如堅
犀刮不動鏗鏗觸硯蒼煙浮蜀牋灑落黑勝漆欲論所
直真難酬麟兒字法肖家學珍綈寶匣深藏收并刀截
斷輒分我始信明珠今暗投嗟予吟筆久已閣辨古倒
卷剛腸柔書陳北闕上印紱志樂南畝親耒耜得君賜
墨竟安用捧翫反覆增予羞況君綠髮眸子瑩才業自
副朝廷求研磨煤麝染諫草扶持世病蒼生瘳名成功
遂取上笏世閥光焰垂千秋莫如老鈍默將死再拜謝

祝長江頭

謝李公擇惠妙墨二餅

南山采松節北山割麝臍燒煙掃煤和去聲膠漆篆記歲

月形蛟螭集賢學士久珍玩云初得自扶桑枝

李得於宗室

張翁所作又精絕磨刮不動猶堅犀鄴臺古瓦汲水試
黑雲隨手生冰池況君學術老益富六經秘法窮無遺
明牕淨几列毫楮而與此物真相宜草玄著就垂萬世
忠厚自任陳安危嗟予吏役久零落至寶暗贈寧非癡

嗚呼大禹已往不復見一尺渾厚疑玄圭

謝王公濟節推惠硯

歛溪之仙洗山骨一輪琢出秋潭月摩挲清潤無纖痕
不學寒光有時缺玉川輒莫憂蝦蟇縱爾觜吻何由齧
陰天着手泉脉生三伏臨之冰去聲炎熱又如明鏡當晴

窓對面森森數毛髮端江品格直頑賤鄴臺片段多皴
裂中山有客先得之獬豸峩冠為忠血竄身南過洞庭
湖覆舟幾葬蛟龍穴君今贈我誠謂何自愧閒官非補

闕松煙和漆法廷珪玉兔長毫妙諸葛敲冰搗楮出烏
田四物收藏豈虛設乾坤俯仰存赤心誅貶奸諛佑臣
節獨刊五傳扶春秋肯趁時文校工拙更衰更老心更
堅與硯相將不倉卒

謝方彥德奉議惠羅文硯

歛溪古源鑿龍尾一片寒冰瑩無比珍綈藏護知幾年
贈我題詩草堂裏驪珠失色悲暗投再拜置之枯木几
硯兮不似在君家捧來自自織纖指

中秋泛月至歷陽訪太守孫公素

中秋拏輕舟西泛采石月初疑擢碎冰壺冰又如飛度
雪山雪若非身世出塵寰底事清光透毫髮宏謝尚
久磨滅含情欲就何人說歷陽太守孫公素竹冒寒霜
松屈鐵昔從赤縣守儀真再至天門請符節紫皇詔長
雞籠仙惠浹春陽威凜冽開倉出粟賙民飢夜戶不扃
無竊發吐哉此事安足論斯人自養班夔高且聞兵厨
醞濃酒桂子秋香月中有請君置我三百杯我為君吟

一千首鑪鋌七竅完混沌能使顏齡遂長久飢橫鎔鄒
鱸鯨肉渴引明河傾北斗憑誰為問陶淵明胡為種菊
仍栽柳豈如永夜無纖雲江光月色鋪黃銀喚取三千
珠履客陶然一飲情無垠劉項輸贏亦安在笑殺今宵
月下之醉人

二月十一日倪倅敦復小園留飲

殘梅零落同寒玉屏翳忽驅斜雨來濛濛點滴夜連曉
園館寂寞生青苔墨雲四卷山露碧日轂照耀天衢開

妖桃映竹煙醅酊細柳拂水風徘徊公要我共行賞
小亭草草排樽罍盈筐菊芽青玉軟滿盤鱗縷紅絲堆
興來一笑且為樂春光半被罵啼催百年已往五十八
借問餘生真可啗平原豪客散煙霧東山舞妓埋蒿萊
眼前不肯飲五斗身後安能傾一杯

和州連雲觀留題呈太守王純父

連雲之觀何寥廓碧瓦危侵天一角深排柱礎貫九江
返掛簾鉤吞五嶽風檣北去煙冥冥雁陣南飛秋漠漠

白衣每從欄下回金盃正在簷前落蔡公書榜妙入神
劍戟縱橫挫予桀王君自是蓬萊仙分符暫與民同樂
卷舒當為天下霖一釣能合六鰲躍滕王庾亮爾何人
回視規模太平削我從姑孰飛輕舟欲陪珠履登斯樓
與公酣歌相獻酬蘭亭俗飲安足求手搖麈尾排斗牛
為君千載揚風流

謝歷陽王守惠新釀

卓犖英才歷陽守年來不得音書久隔江知我巖戶寒

赤泥封送兵厨酒碧玉壺黃金斗雪樹雲峯作賓友為
君一醉歌陽春空山霹靂龍蛇走只愁君返紫皇家西
望連雲謾搔首

寄歷陽張宗孟隱士

歷陽張君心好古水不為寒藥非苦我欲見之波浪阻
安得鄰巢接飛羽百年營營竟埋土進退趨趨亦何補
今歲秣田收幾畝爛醉高吟餘不數

送余秘校

蒼山凍雲猶未消君騎瘦馬來飄飄入門下馬與我語
琅琅滿室鳴簫韶一官初得遭猛守十年困辱朱顏凋
恨無田園即長往醉卧白日歌唐堯去千斗粟活妻子
誰念塵滓汙瓊瑤相逢太息不能已解衣貰酒愁魂消
紅梅零落雪霜洗蒼雁踴蹬狐狸驕男兒功名顧有命
太公七十方漁樵否極泰來如覆手濶步自此凌煙霄
側聞丞相開東閣肯使斯人重折腰

青山集卷十一

欽定四庫全書薈要卷一萬五千一百三

集部

青山集卷十二

宋 郭祥正 撰

長句古詩

送梅直講

聖俞

清風吹天雲霧開
仙人騎馬天上來
吟出人間見所不
可見常娥織女為之生
嫌猜織女斷鵲橋
常娥閉月窟
從茲不放仙人迴
一落人間五十有四載
唯將文字傾

金罍李白佯狂古來少騎鯨鱗鬣飛汭澗杜甫問訊今
何如應為怪極罹天災公乎至寶勿盡吐吐盡吾恐黃
河水決崑崙摧天穿地漏補不得女媧之力何可裁長
安酒價不苦貴風月但惜多塵埃醒來強更飲百盞酣
酣愚智寧論哉

送袁殿丞

世弼

與君六年別愁見雲開露明月樽中有酒雖獨傾萬古
情懷共誰說思君彈瑤琴琴聲為君咽孤鴻高飛不可

攀北風一送何時還欲問鯉魚更難得江頭白浪高於
山尺書彼此絕令人腸百結昨日聞君來我心如鑿龍
門開拂拭囊中白玉璞請君辨之為磨琢感君酬價過
南山即見名聲搖海岳烹羊買酒邀吳姬今朝會合明
朝離莫嗟兩鬢白雪滿請看舞袖紅雲飛雲飛酒闌君
遂起篙子催行趁潮水君行汲汲過西山手植松篁春
正美我亦歸青山白雲相伴閒若駕鸞凰赴瑤闕先到
臨川與君別

送錢賢良 醇老

去年六月梓山裏與予披襟弄泉水高談直出堯舜前
長林為我清風起金船滿滿傾醇醪吳娥玉指拈櫻桃
君令勸我盡百盞肝腸但覺翻江濤醉來騎白鹿大笑
還青山倏忽歲月往思君鬢成斑今朝邂逅蕪江頭論
心握手忘離憂暫時會合復言別安得彈劍從之游我
聞紫微薦君策男兒事業豈易得金門慎勿間經過為
奏天下弊穴如蜂窠

送章秘書

表民

君心抱太古不肯屈世人
匹馬遍朔方揚帆出天津
九疑連天洞庭濶長歌愁殺蒼梧神
更將美酒弔楚屈離騷
繼作疑前身兩姬不灑望夫淚
一笑岳陽樓上春大
夫得意且為樂百年變化隨埃塵
如何南還過我別却
言北去朝天闕上書力訴
闕冤洗眼看君成一節
勸君事直還收身速返東南弄白雲
功名汲汲竟何益韓彭取笑武陵人

送楊主簿

次公

浪花卷雪秋風起開帆日行三百里問君此去安所之
佐邑南城風俗美夫君才業真雄奇四十青衫能養卑
世無孔子禮樂壞君獨勇起勤扶持書成未遇聊自哂
暫向南城為吏隱閑入麻源傾酒卮仙家好景無忙時
瀑綃千丈掛蒼壁玉華萬柄搖清池常娥東來渡銀漢
面面瑩徹皆琉璃謝公秀句發天籟顏守老筆蟠蛟螭
高風凜凜尚可挹鳥聲不斷哀猿啼嗟予學道苦不早

壯歲形容已枯槁聞說名山心即飛一生願向山中老
愛君逸興何由攀飄如孤鶴遺塵寰若見麻姑與王遠
寄我一粒黃金丹

送耿少府

天鴈

白沙岸上相逢時困倚欄干醉似泥忽然聽君誦新作
酒氣頓覺寒風吹今朝邂逅蕪江埃犬軸蒙貺東城詩
雷驚電掣露怪變山崩海瀉能扶持令人壯觀不知已
倦翼欲接青雲飛逸駕固當出塵滓胡為一命東南馳

洞庭波瀾洗天吼
衡嶽葱蒼掛南斗
窮幽歷險詩魂醒
不倦青衫因趨走
屈原賈誼杜子美
白骨荒丘今在否
欵騎瘦馬一弔之
滿眼斜陽入疎柳
詩成寄我慎勿遲
側望陽春活殘朽
暫時離異何足論
酩酊江樓一樽酒

送徐長官

仲元

徐夫子能談經不學俗
儒事章句白首役役勞骸形
我嘗洗耳聽其說寒泉漱玉聲
瓏玲十年茅塞一朝拔
四體自豫神安寧
交遊得君已恨晚
歷陽幾日同醉醒
新

詩百韻忽贈我滿紙落落排明星使我目睛眩又若遭
雷霆自愧久滅沒安足煩褒稱李翰林杜工部格新句
老無今古我驅弱力謾繼之發詞寄興良辛苦幾欲攀
天門擊天鼓女媧有志終難補低頭帖耳逐駑駘倒著
青衫走塵土東風吹破江頭春綠楊紅杏能笑人狂來
且盡一壺酒世無賀老誰相親君今別我又遠適錦帆
千丈迷空碧飄然去意凌崑崙自古雄豪少知識我亦
從今不復言靜看澄江浸寒壁

送李節推

獻父

昨對桃花與君別，共唱離人眼中血。
今見桃花君復來，似與東風趁時節。
北去南還何日休，書生道路多窮愁。
安得巨航滿載酒，一帆風過蓬萊洲。

送李察推

公擇

去年遇君陵陽峯，杜鵑聲亂桃花紅。
佳人玉指按玉板，勸我一醉三百鍾。
醉來騎鯨赴瑤闕，不記當時與君別。
溪上扁舟破雪歸，樓前芳草還春發。
白頭太守重相過，

開樽大笑呼瓊娥向來十客七已去惟與杜九聞清歌
歌聲繞梁離思苦聽不得終淚如雨回首茫茫天地中
聚散百年能幾許今朝此地重相逢秋漢無情江月空
把酒與君須醉倒已知後會皆衰翁陵陽樂事那復得
官賤食貧身愈迫擊劍高吟非故鄉何時共作滄浪客

送姚太博

彥經

春風動地吹春去行人不肯江邊住片帆朝掛暮千里
煙霧蒼茫宿何處夫君少年日射策明光宮同時得意

三百輩上林曾醉桃花紅十餘年間事超忽幾在青雲
幾白骨君雖未甚榮亦足有餘樂存心不負聖與賢何
須畫影凌煙閣潯陽城頭北樓壯邂逅相逢觀溟漲魚
龍奔走勢莫分却憶當年兵火愁殺人至今戰場無綠
草冤魂夜哭寒蟾老臨風瀝酒一弔之而我浮生何足
道聊為君行歌數聲青山截斷江流平晴雲相對似能
舞野鳥好語如吹笙却送閒愁付滄海身雖離異心無
改若到蓬萊王母家為攀桃樹遙相待

送陳屯田知明州

屈指宛陵客八九名世賢我亦駕白鹿往往登俊筵昭
亭自作老龍鬬疊嶂不礙明河躔餘霞散綺入高閣澄
江似練拖晴天黃金買酒不論價壯心共許青春前丞
相初為部使者精選邑治君尤先業聞上書後薦達王
陸引對親承宣付之一節使淮潁三十二縣州無冤嗟
予末路最流落哭兒清淚雙眸穿感君不棄半面雅取
之涸轍投深淵稍回生意漸奮發遽復捨我搖歸船明

朝勅拜四明守四明山水君所憐奈何歲旱天下歎豈
容醉卧滄溟邊我疑帝命養頭角乘春霹靂驚蟄眠白
蘋風靜湖月滿謾弔賀公懷謫仙

送劉繼鄴秀才之岳陽訪木尉

羣鳥栖霞羽毛縮孤雁冥飛何處宿蘆花糝白天無聲
靈妃鼓徹瀟湘曲此時歸夢尋故鄉誰道行人鬢長綠
平生所得惟悲歌時命未遇君如何滿懷策盡獻不售
鳳凰飄泊無嘉禾困鱗不借一盃水異時安用西江波

岳陽高樓掛星斗樓中子真聞舊友請舒和氣邀陽春
便釀重湖作濃酒山葉撩亂舞山鳥縱橫啼古人交道
貴終始樂酣醉倒君莫疑否極泰來不可測豈有壯士
長棲遲豈有壯士長棲遲青雲歧路看橫飛

送吳龍圖帥真定

仲庶

讀書曾不學腐儒腐屑爛舌腸焦枯又不學一詩一賦
輕薄子屑屑場屋名聲沾西州治邑克肖古今尹險欲
臨水投神巫政成召來御史府彈駁庸相請賜雷霆誅

姦邪縮手不敢更侮祖宗法又薦處士博士登石渠富
財治水各稱職乃仗斧鉞臨湘湖興學首教士子弟作
碑後弔屈大夫明年易節帥瀛莫鐵甲百萬秋防胡公
曰永平勿誇武解藏弓劍寬民租詩筒交迎兩朝使鐫
金刻玉論歡愉深沈不動若山嶽節制似公誰可俱少
年天子聖慮遠却顧南國成荒墟拜公學士往綏撫曾
未期月富民大姓爭來居秦淮橋傾滯行邁頃刻指畫
窮精麗斬材疊岸役兵校一物不向民間須月光激水

夜景午長虹矯矯當通衢追思昔人政事美盡求形像
堂中圖二十二人最豪傑森森玉樹臨冰壺前題姓名
後書贊文章髣髴窺典謨昨朝除命下金闕再佩將印
嚴邊樞南民遮道留不得老幼挽纜相攜扶願言早入
天朝作丞相調燮水旱蘇寰區功成異日保身退西江
秋風熟鱸魚斄尾黃雀更珍絕白糯釀美傾醞醞醞
一飲三百盞琵琶啄木喚舞姝舞姝十八如明珠石榴
之宸蟬翼襦舞徹輕汗流香膚桃花帶露燕脂濡綵衣

斑斑羅鳳雛問公此樂世有無此樂世有無何必更訪
蓬萊山上神仙都

逍遙亭歌一首贈太守王君章

逍遙之亭在何許城角西南小溪澣水仙粉面浮清波
羽林兵仗森三畝六月微風拂面寒不信人間有煩暑
借問逍遙真隱徒西山看雪倒騎驢形骸兀兀天壤俱
畫手爭以丹青模大言得罪僅免誅斥參軍事來當塗
傳云此地舊結廬百年荆棘遺荒墟公來相址呼犁鋤

雙亭化出瓊璃鋪欄干間角明青朱四座瑩徹纖埃無
蘭芬麝裂陳罌孟珠履珊珊陪後車東瞻宣詔西浮圖
曉光夕景迷蓬壺愛公心地如明珠落成之樂政事餘
為公歌勸公醉留連亭上能幾時行促星軺還玉陛

投獻省主李奉世密學

祖朝相國之真孫軒軒冠蓋宜高門拔身州掾入政府
議論挺特窮根原顏淵必用宣尼鑄自此聲名聞至尊
熙寧神化邁前古屢詔馳車外循撫大河之北淮之壖

民起疵癘各歌舞樞庭進直腰橫金君臣道合同一心
貨泉交滙指諸掌老吏縮手隨規箴如公之才世希有
突兀千丈輝喬林徐冠貂蟬坐廊廟重見成王得周召
泰山鏤牒天垂休却笑鴻蒙首頻掉賤生流落何可言
四十栖遲埋冗員涸鱗悵望一盃水安用西江浩渺之
波瀾願公吐和氣稍回巖谷春養成尺寸不為公車下
輪它年青史上報德豈無人

俞俞堂寄鄂州李裕老

黃鶴樓南大湖側芙蓉深遠誰家宅云是裕老之宴居
高堂獨榜俞俞額春山抱翠入平簷夏竹引涼吹廣陌
秋江澄月天鏡開冬雪擁林崑閬白世間萬事不掛心
瓮撥香醪欣有客客來乎伴我飲不醉無歸醉還寢問
君欲達逍遙鄉信哉天地真衾枕覺來何物能解醒試
作琵琶打面聲俞俞和氣舒四體安用辟穀求長生君
不見鸚鵡洲前殺禍衡三尺稅杖當雄兵才名誤身不
自覺恬淡晦迹無人爭南北相望二十里夢逐高帆逆

秋水為翁持酒聽翁歌
衣濯黃塵眼除眯

懷青山草堂

三峯連延一峯尊
龍山白紵如兒孫
重岡複嶺控官道
北望金陵真國門
淙流奔激洒河漢
兩溪直接丹湖源
松荒檜老古佛剎
雞鳴春晚桃花村
石崩廢井謝公宅
龜仆斷碣長庚墳
斯人白骨已化土
英氣往往成煙雲
我昔棄官結茅宇
九品青衫安足數
竹筒盛酒騎白牛
醉眼看天與天語
如何蹭蹬隨辟書
十年又向風塵趨

只今兩鬢滿霜雪功業不成思舊廬山花解忘憂山鳥
名提壺四鄰未必便棄我三徑荒草還堪鋤烏泥田肥
種秣稻紫莧味美饒嘉魚盈缸釀酒邀客飲林下散髮
時時梳誰人繫爾不歸去自問此心無乃愚

憶五松山

江南富山水忽憶五松山梁僧種松奪造物至今千丈
凌雲間上有寒蟾吐魄凝冰霜下有銅陵碧澗傾潺潺
雷公睥睨不可以揮斧老鶴飛來勢欲止而復還猿猱

側望何由攀琉璃殿閣若化出西天之衆說法鳴金鑲
我嘗脫屣往棲息六月清風無汗顏濃陰可愛坐盤石
綠酒酌盡橫琴彈命宮叩微天地變聽之以氣往往生
羽翰紛埃不到佛淨國豈識人間行路難塵勞忽起舊
緣想倒騎匹馬來長安修鱗掉尾業已困涸轍孰與西
江瀾髮踈齒缺形將殘畏塗足躡心膽寒屈原懷沙賈
誼貶身後忠名何足觀不如晏坐碧山裏笑傲每攜雲
月歡明朝却欲渡江去五松巖戶無人關方壺員嶠太

殊絕幸有此山容我閒

洛中王秀才談劉伯壽動靜慕其瀟灑作詩識之

客來說劉翁嵩山跨黃犢青衣二隻鬟顏色若明玉手
攜綠牙笛隨軒奏新曲倒傾酒榼松下飲旋開氍毹雲
中宿少年富貴老安閑自道此生無不足令人慕高標
神魄頓蕭爽何當挿羽翼乘風一飛往永結斯人交逍
遙恣真賞長哦紫霞篇洞戶瓊瑤響胡為戀青衫壯節

空骭髒塵埃一閩城郭卑波瀾萬頃滄溟廣明朝未作
嵩少游且向江南結魚網

青山集卷十二


謹案卷十第九頁前六行靈丹插峭壁原本壁訛
懸今改

第十一頁後四行永叔爛漫鐫瑤碑原本漫訛浸
今改

第十二頁後五行紅裳小巫來擊鼓原本來訛未
今改

卷十一第六頁後四行嗟予吟筆久已閣原本久
訛民今改





總校官進士臣胡榮

校對官編修臣裴謙

謄錄監生臣金士虔

欽定四庫全書薈要

集部

青山集卷十

三至六

詳校官助教臣常循



欽定四庫全書薈要卷一萬五千一百四

集部

青山集卷十三

宋 郭祥正 撰

長句古詩

卧龍山泉上茗酌呈太守陳元興

君不見歐陽公在瑯琊釀泉為酒飲輒醉自號醉翁樂
無涯醉來落筆驅龍蛇電電萬里轟雷車濃陰却掃吐
朝日草木妍媚春爭華斯人往矣道將喪雖遇絕景誰

能誇又不見卧龍山下一泓水源接銀河甘且美惜哉
無名人不聞維有寒雲弄清泚君携天上小團月來就
斯泉烹一啜不覺兩腋習習清風生便欲飛歸紫金闕
挽君且住君少留人生難得名山游汲泉滌硯請君發
佳唱鏗金戛玉搖商秋斯泉便與釀泉比泉價詩名無
表裏自愧學詩三十年縮手袖間驚血指君如歐陽公
我非蘓與梅但能泉上伴君飲高詠閣筆無由陪明年
茶熟君應去愁對蒼崖詠佳句

酬運判毛正仲

明公青霄我平地才不超羣懷厚媿小邦苟祿度殘年
側望車塵掩疵癘海浪翻雲古渡頭感公為我須臾留
請說相逢在何處上下梅山成昨游忽得新詩驚老格
飄飄真是金門客蹇驢已困何由攀一夜微吟添鬢白
奉和運判吳翼道留題石室

雙峽天開控江水水自牂牁來萬里端州正在雙峽間
石室嵩臺壓孤壘誰傾北斗酌明河化作七山平地起

修蘿高張翠羽蓋錦壁深藏赤鳳髓鳴禽交應杵臼聲
馴鹿見人行復止一洞能容百兩車三溪却接滄溟底
上瞻圓頂碧玲瓏傍穿小竇陰迤邐不應融結施鐫鑱
浪磅乳滴何年始森然物象難悉名古圖脫落猶堪比
老龜闔首龍縮角猛虎磨牙鯨卷尾又如壯士披肺肝
戴主之忠死無已蒼崖題字多唐人髣髴銀鈎維二李
邕山祇不放雲霧開海神屢汲蟾光洗歐陽古錄遺此
紳我漬香媒傳以紙寂寥相望三百年乃有高才繼瑰

瑋滁陽吳公富文采來擁皇華宣使指霜威暫霽持謙
尊許接清游攜酒醴長絲千結盤雕梅簌簌并刀膾頰
鯉尋仙未遇飲正豪落日嵐烟催返軌明朝大句揮長
篇戛玉鏘金車轉西耳百靈持護歸羊城論價欲酬誰可
擬蔣公毛公並詩伯筆陣酣戰秋風裏越臺朱明被題
遍鵲奔此洞重新美沈侯湘寺陪俊游韓子連山書宴
喜勝槩遂令天下知名齊五嶽無由毀自怜羽翮久零
落只欲早飛藏棘枳漫將俚語續公歌投老那知遇知

已

奉和廣帥蔣穎叔留題石室

西江赴海穿雙峽十里寒青半天插晴空倒影連明河
滔滔不礙鯨魚呬蛟綃高覆紫微冠翠簾平鋪玉皇榻
中藏石室與嵩臺巨壁稜層老鱗甲欲飛未去鳳逶迤
將蟄還伸龍匱匱浪搖蓬島何其危桂塞廣寒無乃狹
大匠不由基構成洞門大啟無人扃六月來游乃挾纊
酌酒向口疑冰生三溪詰曲愈難涉舉燭但愛烟冥冥

返似霜縑見山水畫師只許吳生是有誰文采如昌黎
物物為我從頭記自慚才短空冥搜俚語未足蒼崖留
元戎聞之索大筆默坐遠想書勝游憑凌風力若捕虎
窟束景象如縛仇那知子厚號雅健不識謝守為風流
桓桓斯人富學海少陵重生謫仙在淙琤擊玉敲黃金
倚馬千言未嘗改高下豈必世俗知浩氣已充天壤內
又如淮陰善將畧不戰能令敵先敗暫辭侍從來東南
羊城異日為傳巖不惟已賤吟詠足即看玉牒功名鐫

吳公昔魯賦落落文華精注措毛侯亦許送和章馬上
橫戈寫長句孰云高要陋且遐三篇入石神鬼嗟願揮
硬畫奪劍戟下視鳥跡初遺沙此心雖大慮轉小刻就
頗憂龍作蛇譬之博奕仲尼與羣兒惡用相識譁端溪
石工古稱妙年年琢硯供正衙剛刀截碑易於硯龜螭
相射生彤霞峴山石鼓久缺矣苦縣光和真瘦耶流傳
萬本入中國誰憐此樂瘴水涯共探泉石造淡漠豈憶
冠蓋追榮華公思歸乎欲致主四方飄泊予為家予意

無留亦無去等將幻質隨楊花

奉和梧守蔡希蘧留題石室

疊石稜層萬尋碧老仙自作琉璃宅脩然一徑出人寰
北斗三台無咫尺大巖杳杳吞滄溟小竇踈踈吐朝日
芙蓉冪瀝乳成花鱗鬣摧頽龍蛇骨危絃脆管遞仙飈
爛錦輕綃變雲物二字能書玉鈕懸借竊未是真王質
人亡國變今幾年唯有文章記嵩翠勝游况遇中郎孫
詩擬杜陵相髣髴洪河噴作三門流突騎長驅五十匹

令人驚嗟但縮手近世雄豪無此筆不惟險韻難追攀
學道輸君先得一

奉和蔡希蘧鵠奔亭留別

攔干去天無一尺簾外三山蘸天碧樽傾濁酒延故人
拂拂輕寒添暮色雙鵠飛奔迹已陳滿庭細草自涵春
孤城不復有冤氣法座垂衣逢聖神惟君萬里分符去
蒼梧之邦舜游處九疑七澤皆相連墨海濡毫寫長句
又如李白才清新無數篇章思不羣挺特千松霜後見

孤高一笛隴頭聞我於詩學非無意黃蘆不並琅玕翠
漫甘薄祿養殘年兩鬢垂絲成底事聲出還吞淚如雨
同氣相求別離苦老來頻寄一行書江邊魚雁無今古
南安劉太守席上勸曾叔達酒

金盞莫辭瓊液滿寶檠休嫌燈焰短圓荷翻雨碧雲香
小妓近人紅玉暖百年流轉能幾時一日相逢須款款
扁舟明發下前灘此會清吟應亦罕

勸君歸示南康太守吳子正

勸君歸腰下懸金祿及兒家有良田秣稻肥種菜結實
栗與梨江山滿目烟雲披長年之樂吾無羈何須七十
乃言歸行將七十能幾時分符持節力已疲才德及人
固無盡此身抱病欲何為

儲溪重九阻風戲呈同行黎東美

不登高不飲酒漠漠黃沙翳衰柳扁舟繫纜未敢行江
頭白浪蛟龍吼故園菊花應爛熳客路無窮但搔首却
憶齊山小杜歌人世難逢笑開口

左蠡亭重九夕同東美翫月勸酒

平生看月無今宵一亭危在山之椒下瞰揚瀾連左蠡
白琉璃地覆蛟綃欲披錦袍搥鼓過世無賀老誰相和
屈原憔悴湘水濱夷齊自守西山餓且來登高望明月
拂拂霜風濯煩熱身心都在清涼宮一點無塵光皎潔
與君同游執君手况逢令節當重九不憂短髮還吹帽
頭上有巾先漉酒飲醇酒望明月我歸姑孰溪君赴黃
金闕明年此會知誰健細看茱萸莫輕別

將游五峯度夏代別倪倅敦復

六月執熱思雲泉五峯參差如紺蓮修松傑栢上參天
老鶴棲唳哀猿懸常娥夜濯清冷淵巖戶晃白飛羣仙
胡不往矣逃塵緣散髮赤脚臨風前高軒朱衣君自便
去住彼此遙相憐

和守訥上人五峯見寄之作

木杯足躡浮驚湍却愛五峯如戲鸞一錫飛來卓出蒼
玉髓又有黃金百鎰藏蒲團道人得道每如此條來忽

往非生死叢林成就八百年香厨日供三千指訥師今
亦浮杯徒問答言詞瀉秋水脫去儒冠披壞衣一生長
在名山裏殷勤笑我騎鯨魚詩狂酒怪何時已七言哦
罷欲無言坐看峯頭片雲起

送上饒道士吳師韓復游淮西

水精之仙降人間身披羽衣目澄瀾或求禍福語必驗
手中開闔陰陽關淮西太守喜賓客鶴駕却欲乘風還
勸君飲酒莫言術龍虎收藏歸抱一

重九日同修顓惠雲二禪師游浮山訪洪璉長

老

邑城東南百餘里穿盡荒山渡重水林傾路轉大壑開
峭壁崔嵬半空倚上無勾連下無根鐫鑱難成畫難比
回環巖竇碧玲瓏月華吞吐湖光洗石鼓晝鳴雲雨垂
金雞夜闕龍蛇起成公說法已千年事載龜趺尚新美
嗟予平生慕佛學空洞忘機造玄理暫來福地神愈清
况接高禪揮麈尾晉顓悟道天下師雲璉聲名自予始

精藍際會付三人淨衆如歸聞法喜今朝更結名山游
寶閣珠樓同踐履達了無生無不生一聲猿嘯清風裏
龍眠行留別修顓禪師

桐鄉山水天下名龍眠氣勢如長城重岡複嶺跨三郡
盤壓厚地攢青冥東南佛寺號投子寺門洞啓元無局
雪峯三來道方契鑿井百尺穿重冰至今善利永不泯
輓轡夜轉聞寒聲慈濟玄談載金刻龜趺鱗甲光熒熒
誰憂怪變碎以斧半落崖下莓苔青時移歲晚人事塞

高座竊據非真僧白雲徒侶半凋落泉石徃徃荒柴荆

我來挾獎眼除眯顥自壽至人天迎隨車貝葉五千卷

寶藏突兀同時成張翁好施古亦少助我福地還中興

老禪咒龍未三日泉發石上吁可驚晨厨千僧用無盡

琅玕引溜何泠泠城中客少民事簡屢攜茗酌來煎烹

叩師玄關問至理心地拂拭菱花明妙峯勝會豈殊此

迷即成凡隨死生明朝官滿重回首別師寫作龍眠行

留別金陵府尹黃安中尚書

扁舟載月入金陵金陵尚書倒屣迎白髮愧彼南山皓
青眼欣逢阮步兵開壺傾酒飲未已卷紙連書吟不停
願如賀監憐太白莫作曹公嗔禰衡

奉和安中尚書同漕憲登長干塔

攬衣登塔窺沈寥黃金篆牌神所標層梯轉道二千尺
鈴索交響風常飄天厨曉送阿育供海月夜領飛仙朝
南溟安在心欲化九萬一舉期今朝我宋真人啓閭闔
堯舜之運重昭昭佛老并儒鼎足盛理歸一善無煩條

淨緣勝賞固莫逆足力強健朋儕要昌黎首唱城南句

東野繼作芬蘭椒諸公筆力闢穎發七言紙上鏗琨瑤

聚沙疊甃付童子秀實始自春之苗凌空得路未足恃

遇險驚魂安可招龍虎低沉鳳鳥散藉此彈壓無侵妖

四郊松柏列兵衛萬家絃管均咸韶廣莊黔烏類蠛蠓

歲望已覺元鼎調晴川踈樹歷陽近浮雲蔽日長安遙

貫輪巨木徹十地斜飛八角穿重霄扶持故國肯父老

綜領諸刹如孩髻循欄作禮共悲仰絕頂進步誰騰超

迹雖有為志頗壯報且不盡功何遼揮毫題識未云畢
城頭鼓角聲迢迢兜綿鋪舒換塵境寶燈照耀銀為橋
乃知此會世稀有請君審聽長干謠

即席和酬金陵狄倅伯通

虎踞龍盤古名郡勢欲凌波予未信偶搖雙槳下天門
白鷺三山隨一瞬捨舟登岸青溪濱蒙蒙柳眼初含春
感君攜酒喚小妾要我一飲頽冠巾開懷猛酌寧辭醉
明朝且入梁朝寺刀裁尺量非扇迷興來欲跨橫空伎

南風更送琳琅篇明珠十斛投歸船與君定交增浩然
誰謂此行垂索還

治水謠

去年圩破官不救闕食逋亡十八九今年大水如去年
民困適遭何令賢賢哉何令能治水槍去聲木編蘆多准
擬賞罰公平貧富均赤脚親臨食亡匕每趨危墊必身
先徃復連宵幾百里浪頭作惡工莫施一拜能令二龍
起白龍先去黑龍隨鱗鬣分明皆見之須臾浪定埂可

禦父老驚嗟咸涕洟西門投巫安足比亦勝乘輿濟溱
洧活我生靈十萬家惠澤陰功浹神理天子臨軒方用
才時時有詔搜草萊請歌何令能治水願採斯言獻天
子

游陵陽謁王左丞代先書寄獻

和父

布衣射策趨蓬萊十年得志聯三台懷仁附義天下悅
忠言屢叩宸聰回不惟盡赦息錢息曾均惠澤覃枯骸
先皇晏駕舊臣老白雲黃鶴空徘徊藩城六見換符節

直道自任寧嫌猜
昭亭扶春入畫戟
句溪洗月供吟盃
佳賓三千集珠履
赤子十萬登熙臺
玄暉比公固不足
我攀太白慚非才
披雲拂霧一何晚
泥滑不敢鞭駑駘
明朝迤邐造賓榻
願逢浩氣吹寒灰
玉上青蠅本無有
都人爭望公歸來
公歸來至尊入夢天
顏開

謝王左丞惠冰酒十五斗

昨夕發姑孰
今朝泊敬亭
輕雲淡日天地暖
杏花吐萼梅飄零
春光一瞬豈足賞
聽公疊疊高談傾
昔年庭爭

動丹陛君臣道合趨昇平巖廊辭位已十載氣度杳杳
涵滄溟公田種秫作新酒槐槽旋注琉璃瓶不將歌舞
効俗飲時時一酌差獨醒感公贈我十五斗酒量安得
如劉伶願公歸去廟堂上盡使斯民醉醇釀

題橫山陶弘景書堂寺

先生燒丹騎竹馬情戀蕭公碧城下故物無餘只五泉
亦有松風伴蕭洒誰來洗耳復洗心寥寥千載聞遺音
寺門不掩象燈滅猿隔數峯時一吟

代先書寄廬郡朱龍圖行中

楊花塞路春無聲鳴鳩喚婦留春晴揚鞭朝發浚洹縣
卷簾暮宿金斗城城中主人漢賈誼妙年射策都羣英
峩冠獨立御史府冰霜凜凜清朝廷遙乘白雲渡銀海
十年望闕心常傾只今淮西課異等沉沉玉帳閑府兵
神機照物辨毫髮提刀四顧新發矂行聞召節返西掖
至尊開閣思談經豈容燕寢自顧養畫戟森衛清香凝
陳公雖解豫章榻白頭重愧非徐生飄零漁艇荷蓑笠

揣摩舊學荒柴荆願公一吐太和氣朽株巖下逢春榮
合肥李天貺朝請招鍾離公序中散吳淵卿長
官洎予同飲家園懷踈閣

一閣橫空連野水久客歸來洗雙耳二疏雖解散黃金
家園未必臨清泚坐見紛紛煙雨入千里瀟湘畫圖濕
魚鳥相忘蒲葍深兩岸桃花為春泣鍾離辭榮已三品
吳令早休今八十我亦棄官姑孰間邂逅相遇手重執
閣前旋解青板舫呼童移擢遊清淵四座白髮笑且飲

岸人疑是商山仙亦如賀監在東吳醉下山陰弄鏡湖
月色蓮香迷近遠且要李白騎鯨魚古人今人樂如此
出處無瑕傲生死君不見功成不退人重著藍衫脫金
紫

麗人曲贈鍾離中散侍姬

髮如盤鴟面如玉飄飄羅袖長芬馥妙年得侍碧虛卿
自道一生心已足黃鸝流語春日長綠窓繡出金鴛鴦
朝暮祝卿千萬壽不識相思能斷腸

中書舍人陳公元輿以詩送吾兒鼎赴尉慎邑
卒章見及遂次元韻和答

嚼君老句勝牛乳又如旱稼濛甘雨龍眠一別魚雁稀
幾度看雲與雲語鳳池搖筆贊帝齡珠璣洒落黃金城
鼻端去堊鬼膽破霹靂轟車風雨驚事君以道非難易
不羨昔人囊有智柏梁屹屹漢庭材寶鼎顓顓周廟器
我在江湖寄此身碧蘆青荇遠黃塵感君問我尚安否
病樹前頭萬木春強汎月船追李白無人愛客似田文

青山集卷十三

欽定四庫全書薈要卷一萬五千一百五

集部

青山集卷十四

宋 郭祥正 撰

長句古詩

前雲居行寄元禪師

憶雲居乃在滙澤西南脩川之隅山盤盤兮石門屹立
磴道絕飛瀑萬丈淙冰壺雲沉沉兮方晝而忽暝古木
交錯兮藏鼯鼯攀崖欲上復自止投險却憶騎鯨魚崖

迴時復造平野絕頂乃有百頃之膏腴羣山下瞰若聚
米殿閣枕藉非人區露華洗出太古月桂子搖落陰扶
疎清風欲借羽儀展穢念頓覺秋毫無老禪底事不度
我紅日東上還驅車如今正似武陵客放舟已遠嗟迷
途青春一往二十二白雪漸變千莖鬚西來忽遇歸飛
鳥青紙遠寄黃金書靈茶香味勝粉乳滿篋所贈逾瓊
琚玉川七碗喫不得灌頂未識真醍醐南還北訥惜已
死唯師秀出孤峯孤潛深隱密自得所豈不憫我棲榛

蕪倒影射巖猶入石異日三椽容野夫

後雲居行寄和禪師

我所思兮歐山之顛白石蒼木蔽窺而幽寬兮路通乎
兜率之天層樓複閣觸峙絢爛往即造兮雲渤興而澶
漫徙倚恍惚若奪吾魄兮聊投睨以盤桓徐風生而霧
散卷綃縠于林端洎天清而日上兮瀑峻飛而潺湲畜
而為潭泄而為澗運之以車兮盈乎大田然復度石橋
登重門睹篆玉之榜謁金仙之尊徒衆五百龐眉皓首

形儀靜而不雜兮語言要而不煩齊興止以鐘鼓兮善
後先而靡難舉正眼而諦瞬兮了無一法之可觀寂兮
樂兮妙復妙兮其惟真如之禪我請棄冠釋帶以投依
兮師則指乎未契之緣于是曳屣却步循磴道而復返
兮歲眇眇而屢殘觸網羅以系累兮方傷羽而戢翰悵
昨游而欲再兮庶已創而復完亂曰疇將歸兮卧龍之
室依人道師成佛而出

贈潛山伊居哲先生

伊君頭戴星文冠遨遊五嶽何時還結茅却在潛山裏
閉息自養丹田丹聞說年齡七十九髮如鴟青亦稀有
生平讀盡道藏書寓興成詩僅千首清風生我太古弦
彈罷時傾一壺酒門前手植數本松看爾凌雲比予壽
高奔日月瞻玉京陰氣鍊盡陽氣成行聞北帝呼六丁
紫書下責鸞鳳迎潛山空留千載名白雲不斷溪長清

贈桐城青山隱者裴材

青山為主身為客主人借客青山宅白雲自在千里飛

長松不換三冬碧
藤枯誰與寫作龍
龜老何年化為石
落花隨水眷深源
鳴雁過江悲晚色
家無妻子心無累
項冒寒霜踵藏息
月明舞影聊盡歡
一點塵寰不留迹
倘來軒冕真可嗟
朝為公卿暮遭謫
屈原賈誼爾為誰
問君何似青山客

寄劉繼鄴秀才

憶昔重游樂
尋春之宛陵
天機織出萬山錦
虹橋倒影
銀河明游絲
縈空白日暖
好鳥亂響清風生
疊嶂樓中

索美酒坐上客子皆豪英諸姬合雜卷絃管一人妙唱
為并瓊玉板斜開厚冰裂鴛鴦索拍秋波橫酒盞貪歡
不知數夢入瑤池通宵醒誰知一別萬事錯荷衣倒着
來江城青雲散盡落青野長絲掣斷無長鯨鄉山好在
却歸去當共故人吟此情

題杏山阮氏高居

仙翁得仙朝玉皇當時種杏盈山岡傳聞落英堰流水
每到三月溪泉香白雲霏霏出幽谷獨鶴沉沉唳喬木

寒潭深處睡蟠龍
靈草芳時躍青鹿
丈人何年居此間
詵詵孫子如芝蘭
抱才求進十五六
亦有隨計鄉書還
步兵傲世逸千載
誰道風流至今在
軟炊玉粒烹黃鷄
客子雖多意相待
我愛長吟登好山
到此便欲辭塵寰
可能築室輒延我
為君鍊熟黃金丹
丹丹成大笑分一粒
坐令綠髮回朱顏
浮生百歲不早悟
日月擾擾空循環

杏山葛洪種
杏煉丹之地

銅山寺

田塍行盡蒼山轉溪水滔滔晴曝練馬蹄怯石鞭不行
十步九蹶令人倦黃昏到寺亟就榻山僧苦來邀我飯
香粳新收野菜肥一飽令人百憂散篆香欲盡象燈暗
林聲肅肅苦霜霰暫來福地能清虛何用致身居諍諫

隱靜寺

門橫大溪溪淨碧人不捕魚魚穩潛哀猿長嘯霧垂地
饑虎一聲風動簾金仙像古苔蘚剥鐵磬夜敲規矩巖
道師達性傲時輩不信書生來養恬

碧霄峯下車輪停道師未返誰逢迎山雲着地雨正急
春水滿田人不耕饑虎嘯風大石裂倦鳥喚鷓深澗鳴
客心欲去且復止坐飽香飯餘何營

浮丘觀

仙翁得仙二千載滄海變田田變海浮丘却接番禺西
鑄跡萬痕至今在朱明之門敲不應荆榛滿地誰重興
使君舉意要卜築樓觀矗雲如化城李白騎鯨下蓬島
常娥洗月來滄溟相逢且勸百壺酒蟠桃結實何時成

使君自有神仙骨往往前身尋舊物手探樹穴求玉環
肩拍洪崖猶髣髴更提椽筆揮長篇至理直欲追玄元
行當跨鳳返金闕回首番禺空紫烟

明皇十眉圖

明皇逸事傳十眉正是唐家零落時霓裳曲調雖依舊
阿蠻終不似楊妃畫工貌得非無意欲使流傳警來世
翠翹紅粉尚爭春隱約香風起仙袂六龍真馭竟何之
泰陵荒草長狐狸空將妙筆勸樽酒醉覺人間萬事非

九疑山圖

噫吁噉九疑山色何雄奇坡陀詰曲不足狀九峯萬丈
排天靡嶄嶄儼若九老坐乾顛坤弱能扶持崖回時復
見華塵原本旋有山經題白雲綿聯芳草歇拱木夭矯
狂風吹上有源源不絕之寒泉下有沄沄不斷之深溪
初疑青銅照碧落忽見雲漢飛虹霓丹青畫出尚如此
而况高步窮嶮崎或云重瞳一來不復返二妃血淚斑
竹枝惜哉不經孔子辨後世誰能公是非堯非幽囚舜

不野死堯崩民如喪考妣舜非游仙而幸此羣猪聳耳
聽童子游人擊之變風雨見豕負塗聖所惡仙人護之
亦何補我知神仙術已卑但愛此山雄而奇背圖南望
未能到高吟盡日長吁噉

醉歌謝太平李倅自明除夜惠酒

一年醉三百六十日今朝年盡酒未盡自顧形骸無得
失浮生七十行六十猛飲狂歌須汲汲吾邦倅貳李自
明愛我頽然荷蓑笠雙壺滿送瓊瑤漿春風爭從四支

入君不見劉項存亡安在哉暫時龍虎轟風雷
盜說行晁錯戮躡蹤刺客橫刀來又云舜野死堯幽囚九疑
連延雲霧愁不如飲酒醒復醉抱甕負鋪渠無仇滄海
化為酒蓬萊作糟丘與君攜手去赤脚踏鰲頭

同蔣穎叔林和中游鬱孤臺

匹馬初從瘴嶺來登臨喜上鬱孤臺鬱然而孤插天半
亂山却出晴雲堆雙溪倒流玉綃出萬屋蘸碧長城開
捫參厯井豈足數俯欄引手持斗魁月空銀浪試一酌

坐憂桂樹生黃埃妙娥舞袖迴白雪琵琶十面轟春雷
吟牋分軸造險語酒令行賞無停盃哀猿不斷片帆沒
歸鳥自送殘陽頽脫身我作耕釣客兩翁均是巖廊材
共游絕境發佳唱驪珠射目精光皚升沉從此遂分手
願借惠澤蘇蒿萊

贈南康劉叔和秀才

俊才落落如君少養之九年應大妙滿懷騷雅輒見投
圭璧琮璜予所要勸君且學充其科殿前筆陳揮長戈

錦標奪取獻天子寵祿及親榮耀多

姑蘇行送胡唐臣奉議入幕

登姑蘇望五湖范蠡扁舟竟何在吳王宮殿惟荒墟民
貪吏狡郡多事煮鹽為盜無完膚使君誰何好平恕寬
則脂韋猛則虎只今卧治聞黃公更得高才歸幕府願
令里巷歌召南風化流行成樂土昔年引對大明殿國
論軒軒動人主往持使節臨朔方威霽秋霜愛春雨玉
上青蠅誰強指鼻端有堊寧傷斧升沉偶爾非吾嗟不

用東方且為鼠豈聞絕代無佳人何必西施妙歌舞盛
傾綠酒鱸肥鱸承詔還從大梁去

擬桃花歌

酣酣桃始花灼灼粉面笑粉色射花光奪盡丹青妙藍
衫馬上郎風流亦年少語言雖未通精誠默相照斂容
緩步復掩門只見桃花不見人輕紅淺白正含露欲落
半開將送春凝心駐馬日漸晚隱忍時時下前坂回頭
又不見桃花唯有青山遮醉眼揚鞭擊鐙歌團扇相見

不如不相見逢人寄語問桃花春殘吹洗落誰家

怡軒吟贈番陽張孝子

古云蜀道難蜀道之難難於上青天孝子尋親不辭遠
草蹻負米離番川西從荊州望夔國捫蘿躡石穿林巔
峽山愈深人迹絕但聞悲風冷澗聲潺湲汲溪鑽火行
復食夜宿茅屋衣裳單迴看江南路九千一見歸客吞
悲酸寄聲吾母形骸安慎勿為語皮皴乾涪州城西遇
征蠻城門防盜白晝闔撫膺仰天涕洟瀾見親之難難

於蜀道難成都漸近心稍寬踴躍可得瞻耆顏父昔離
家子方孕子得見父今壯年胡弗歸兮死敢請慰我慈
母心懸懸三往三返又十載孝子執轡方言還番人聞
歸競嗟喜夫婦白首重團圓誅茅立屋奉甘旨陳侯篆
榜名怡軒春禽提壺助春飲綵衣自舞春風前腰金饌
玉非我欲但願眉壽雙松堅朝熙熙暮熙熙誰將朱絲
繩奏我怡軒詩

憶敬亭山作

忽憶敬亭山翠碧千萬尋白雲拂地弄晴影黃猿嘯晚
清人心桃花流水三月深柳絮披烟辭故林重樓複殿
据山脚像塑制度祠非淫晉時謝守曾賽雨至今石上
鐫遺吟五言雅重叅二典琅琅一誦鏗璆琳綠潭無底
白玉沉千載何人知此音李白騎鯨出滄海回鞭曾宿
岩龕岑却泛虛舟弄溪月紫霞之杯傾不歇醉來更約
崔宗之秋水玄談清興發數公逸駕何當還悵望英風
不可攀信道相看兩不厭古來只有敬亭山

青山集卷十四

欽定四庫全書薈要卷一萬五千一百六

集部

青山集卷十五

宋 郭祥正 撰

長句古詩

鄭州太守王龍圖

贊之

出家妓彈琵琶即席有

贈

偶騎匹馬游仙關瑤池夜宴歡未闌邀予末坐聞清彈
琵琶十槽聲正繁初疑饑鸞啄玉應天響忽似霹靂數

聲春氣還曲遍將終檀板急舞袖裂霞隨拍入踏碎瓊
筵鸞步嬌汗透香綃露桃濕解條罷舞整花鈿宛轉仙
容雁行立主人使令持酒卮香隨羅襪成塵飛銅龍無
聲夜無極煌煌燭焰回朝暉桃源花落長溪淨人着秦
衣樽俎罄豈如此會絕風流主人慇懃賓客敬我作短
歌公聽取人世百年能幾許樂極哀來古所悲不如立
功當此時

瑞昌雙溪堂夜飲呈吳令

子正

星斗闌干月未吐但愛溪聲似山雨青燈照室並銀花
白酒傾來不知數子善評文我不如我亦談詩子深許
酒酣索我須論兵拔劍畫地軍陣成十萬強兵指掌取
五方應敵旋風生文武道判惜已久聖賢相遇猶難并
相如漫作長門賦屈原虛著離騷經不知於世竟何補
可憐博得十年名韓信收身苦不早功成伏劍真草草
始終最愛巖子陵坐視乾坤任傾倒咄嗟語險氣已傷
况復賦詩聲調長卷紙連書不磨琢子鋒大峻非我當

撥置萬慮付江海收拾寸心歸老莊天地得一馬喻馬
喟思前事皆佯狂

寄吳著作

憶與君別時君行朝北極潯陽江頭車馬光意氣翩翩
動秋色君還舊廬能寄書謂我楚辭傳上都是時盜賊
正紛擾日夜奔走承使符謝君後時聞已惡

過各切

交深

豈必書間數誠明相照期無窮但惜遠別臨春風春風
來已老落盡桃花紅有時孤坐碧山裏彈指倏忽成衰

翁文章不直一杯酒功名付與千年松何時逢君談豁
我此愁恨攀雲不見麒麟蹤超泥自笑駑駘鈍兒女安
否今何如親雖未成交莫踈願君富貴情不改敢將瓦
礫贈明珠

將至江夏先寄太守李學士

公擇

二月發姑孰三月到潯陽聞君解纜纔五日驥尾難追
空斷腸十年前作潯陽吏老狡相逢猶引避中丞孤憤
已沉泉時事愈新誰敢議欲吐哀音寫心曲濛濛江聲

搖地軸橫琴靜夜按金徽泛到商絃斷還續憂能損氣
須忘憂移船漸近黃鶴樓樓前芳草漬烟碧君今賢過
奇章侯試詢樂部誰工笛曹王舊曲何人識水中龍應
雲不飛月華正在江心白滿傾綠酒濃如油為君吞却
鸚鵡洲開帆快意出天外可惜礙斷長江流

予嘗尉潯陽日事故

中丞呂獻可

蔣公檜呈淮南運使金部

穎叔

此檜希魯侍郎

漕淮日手植

淮南庭中有蒼檜仰視團團翠葆蓋直榦每容鸞鳳棲
盤根深壓鯨鰲背北風夜作兵陣聲恐取蛟龍斬天外
呼童出屋為我窺摩颭清陰月光碎問誰植之前蔣公
得地倏經三十載不同種杏上青天正似甘棠有遺愛
使華今復見公孫太平事業鍾一門祖廟冠蓋漸塵土
却嗟此檜春長存孤高豈忘栽培力秀發兼承造化恩
已看枝葉飽霜露終作棟柱扶乾坤新詩編聯盡珠玉
光大先烈聽麈尾更憶丹青妙畫手進入明堂達至尊

蜀道難篇送別府尹吳龍圖

仲庶

長吟李白蜀道難蜀道之難難於上青天
蛇并猛虎殺人吮血毒氣何腥膻
錦城雖樂不可到側身西望泣涕空
漣漣其辭辛酸語勢險有如曲折頓挫
萬丈之洪泉世人不識賢玉璞每欲酬
價齊刀鋌求之往古疑未有惜哉不經
孔子之手加鑱鐫公今易節帥蜀國為公
重吟蜀道篇旌旗翻空度劍閣甲光照
雪叅林顛雲鼇連摧谷聲碎畫角漫引斜
陽懸竹馬爭迎舊令尹指公

長髯皓素非往年蜀道何坦然和氣拂拂回屋塵長蛇
深潛猛虎伏但愛雄飛呼雌響亮調朱絃時乎樂哉公
之往也九重深拱堯舜聖廟堂論道丘軻賢撫綏斯民
賴良守平平政化公能宣來兵興學有源本何必早夜
開華筵嘗聞家家賣釵釧只待看舞青春前此風不革
久愈薄稔歲往往成凶年噫吁嘻令我無匹馬安得從
公游盡書政績來中州獻之明堂付太史陛下請損西
顧憂

錢塘行送別簽判李太博

獻甫

東南會府唯錢塘
高門雙開南斗傍
門前碧瓦十萬戶
曉色滿城烟雨香
聖祖神宗造區宇
應命最先吳越王
不經兵火二百載
地饒沃衍民康強
蓮花紅白西湖芳
南山翠影臨滄浪
瓊樓寶塔照日月
塵埃不到炎天涼
畫舫羅幕盡高卷
白玉美人游冶郎
年年中秋海潮過
萬頃銀山面前墮
少年輕命爭弄潮
手掣紅旗逆潮簸
聞君此行承辟書
伯樂能求汗血駒
四時風物同吟嘯

十郡兵民歸卷舒公閑畜德聊自養承平功業還吾儒
况君登朝未四十慎勿出處窮歡娛慎勿出處窮歡娛
臨淵履冰佩瓊琚

天台行送施上人

平生樂山水聽客談天台盤石摩挲浸海月瀑布淙射
煙霞開山腰噴作千岩雨潭底晝夜轟風雷諸峰攢叢
護寶刹地與世隔無纖埃仙葩靈鳥四時有石砭玉洞
清風來施夫子欲長往高謝功名脫塵網况有西來老

師宿了晤無生任消長若許陶潛載酒過便駕蒼虬逐
真賞

蹉跎行送裴山人

蹉跎蹉跎裴山人破帽麻衫被埃塵忽來訪我環峯市
醉倒不顧傍人嗔壯士不得志汙泥困脩鱗誰傾滄海
救枯澤矯首奮鬣乘風雲回頭問燕雀爾輩胡為羣巢寄
栢梁一朝火孤棲風雨更誰隣蹉跎蹉跎裴山人行路
無窮鼻酸辛元通獻甫儻不遇况有特達朱純臣蹉跎

勿蹉跎豈有壯士長遭迍

道林寺送別崔提刑

用沈傳師酬庾
侍御姚員外韻

湘江傾瀉明河源
湘山來落如駿奔
尋幽乘興莫辭遠
白雲中有黃金園
佛師無心法愈密
徒衆先後陳卑尊
甘泉噴洒仙籟爽
此身已覺超籠樊
高堂却見山外水
古鑑磨開蒼蘚昏
長城深鑠萬家富
老木自作千營屯
兩洲半沒鯨鼓鬣
雙崖斗起天為門
滄溟不識幾番變
石泐猶有濤深痕
茯苓愈大愈堪食
深鋤但惜傷松根

登高覽物亦徒爾秋色況是當離樽
崔侯才思銳無敵
蒼鷹得免霜翎翻嗟余染翰愧復止
累句何足先行軒
故人柄政坐東府請君獻策安黎元

游石盆寺呈蔣殿院兼簡余光祿

石盆古寺蒼崖顛斷碑皴剝無人傳
其文僅識隱巖字
御史飽學能推研乃是鄭重之別號
洛師易節來刺宣
風流直欲繼謝守行春車馬時聯翩
紅粉行行

杭音

杏花

笑旌旛爍爍雌霓懸松聲颼颼雜
簫鼓薜園繚繞疑檀

煙不知身世有軒冕且將樽酒投林泉暫時樂事亦難
遇高文大字精磨鐫可嗟榛棘一藏晦清風零落三百
年洎逢佳士始珍賞洗滌塵垢邀神仙坐思往迹若夢
寐明河千丈傾辭源啼鳥至今不避客上下啾聒兩耳
邊山僧構亭又高絕羣峯葉葉如青蓮崔嵬寶塔掛落
日沈碭冰壺撐釣舩余公胡為未嘗到美景若此寧弃
捐請攜吟筆窺造物更向雲中調管絃

凌歊臺呈同游李察推

公擇

臘月欲盡春風來壯士尋春上高臺金烏漫飛光徘徊
照徹冰霜天地開梅花披香柳烟裏狂殺錢塘蘇小小
玉簫金笛鳴高樓悵望傳書落青鳥吾曹強飲三百杯
老去功名安在哉欲駕飛魚入東海王母為我傾金罍
蓮華變碧蟠桃熟仙家四時應不速醉來拍手乘紫烟
游遍洞天三十六高歌香渺春風裏我懷清澈西江水
腐儒往往往哈吾狂猶幸揚雄作知己脫君身上蜀錦袍
解我腰下并州刀更沽美酒共君飲不負今朝春思豪

凌歊臺呈同游張兵部朱太守

江東使者武陵仙姑孰太守南都賢同時文采耀場屋
今日寵榮分使權歲豐民樂官吏肅登高望遠開華筵
凌歊古臺壓城北天門牛渚遙相連六朝盛事竟何在
白雲芳草空綿聯黃鳥聲酸落花雨青蒲風送西江舩
鳥聲繚亂帆影沒勸君莫負杯中物百歲榮華如轉輪
一半光陰已倉卒寧須雜絃管不必煩綺羅紫萸煮豉
肥鱸膾更聽江南賤士歌堯崩舜立天下治廟堂靈芝

最為瑞嵒穴自此無遺民請把長戈鑄農器功名來時
如等閑四皓去矣誰復還一朝攘臂揖太子社稷不動
安如山可笑屈夫子憔悴長江濱欲將獨醒換衆醉竟
葬江魚愁殺人古來得失既如此今朝幸會青雲士功
成早晚歸桃源回首塵寰脫雙屣

嵩山歸送劉伯壽秘監

松荒菊老嵩山秋翁將歸兮邈難留幅巾短袖騎黃牛
脩然自作山中游山中游誰與伴兩姬窈窕吹牙管千

崑萬壑鸞鳳吟常娥側耳冰輪款五音和暢王道成不
是嵇康廣陵散問公此曲誰為之曲曲新翻公自為古
人令人不到處能與陰陽四序相推移我知公心通造
物豈止人間妙音律天子呼來換舊章樂成四十有五
日奏之明堂奉祖宗天地清明和氣溢至尊寵賜腰橫
金自謂榮華非本心再拜辭魏闕揚鞭歸故林故林在
嵩山白雲幽徑深濯我衣上塵重瀉山水音只應王子
晉跨鶴每相尋

月下獨酌二首

長空無雲江水淨月出東方掛金鏡我時有酒何處斟
破碎寒光借漁艇便邀玉兔乞靈藥已粒為醫天下病
玉兔既不報我亦醉不知舟人解事喚我起月輪已轉
西山西人間萬事不可了且與明月閒相隨

明月不解飲何事解照琉璃鍾金波蕩漾使我惜不徹
一酌萬事逃心胸良時忍自棄聖代真難逢生平不知
耕與戰唯知猛飲大笑吟清風竹林七子豈足數淵明

五柳方途窮一身不為萬乘屈
傲笑嚴陵垂釣翁明朝
官滿歸去來今但願月輪不缺
樽酒不空吾君萬歲坐
法宮四海長靜無兵戎

青山集卷十五